

La ristga dal repeter il fauss

DA CLAU DERMONT

■ **Tgi che persequitescha la debatta sur la democrazia ha segir già udi il mantra da la democrazia directa: participar a decisiuns procura per savida ed experientscha politica, e la pussaivladad d'as participar maina a las meglras soluziuns politicas.** In mantra repeti mintga dumengia da votaziun, l'emprim d'avust, e dals profets che pretendan anc dapli pussanza per il pievel. Ina furma da regenza che procura dentant era per la pussaivladad da manipulaziun. Il papa ha sustegnì l'elecziun da Trump il 2016? Obama è naschì en Kenya? U er en Svizra: Ils custs per la Billag vegnan a crescer sin passa milli francs, ha Bigler sunà il zain grond il 2015. Na, na, na, natiralmain betg. Ma istorgias e famas sco quellas sfalsitgeschan la debatta democratica. La ir-

razionalitad va uschè lunsch che studis en ils Stadis Unids sunter las elecziuns han demussà ch'igl è schizunt cuntraproductiv da vulair sclerir tge ch'è «fake» u fauss. Tgi che repeta la pulenta fa che lezza è anc pli preschenta, l'aggiunta ch'i saja fake va en emblidanza. Per l'autra, era sch'ins procura per infurmaziuns ch'èn cleras u p. ex. scientificas en connex cun la midada dal clima, provochescha quai plitost ina cuntrareacziun ch'ins è anc pli persuadi che la midada dal clima saja in «fake» stagl d'acceptar la realitad.

Ils filters da percepciun procuran uschia per ina tschorvadad che lascha be tras quai che conferma nossa vista dal mund. Intenziuns da curreger provochechan be in rinforz da questas vistas. E sco il politfilosof Jason Brennan argumentescha en ses cudesch «Against Democracy»: perquai che nus tuts essan bler

memia irrazionalis, plain pregiudizis e diventain agressivs tras la disputa democratica n'èn ils resultats da la democrazia atgnamain betg suffizients per restar tar questa furma da regenza. Tenor Brennan è la gronda maioritad da la populaziun en ina democrazia «hooligans» politics u apatics. Sia resposta plitost elitara: Nus duvrain in sistem politic che maina tar ils meglers resultats, e perquai è el persuadi ch'ina epistocrazia – la regenza dals sabis – fiss la soluziun per ils problems cun hooligans democratics. Nagin dretg universal da sa participar, be sch'ins è pipa da far decisiuns logicas a favur da tuts.

U sche nus na vulain betg gist midar l'entir sistem politic: almain betg repeter il «fake», perquai che nus be bullain il messadi faus stagl da sclerir.

L'autur è politolog

